

## ARLeF: e tache la consegne de bandiere dal Friûl intai Comuns

La iniziative e à vût un bon acet di bande des aministrazions locâls che, ai 3 di Avrîl che al ven, a podaran vistî di fieste i lôr comuns

E je daûr a tacâ la consegne des bandieris dal Friûl ai Comuns furlans che lis àn domandadis. La iniziative promovude de Agenzie Regjonâl pe Lenghe Furlane - ARLeF e à vût un bon acet di bande des aministrazions locâls che cussì, in ocasion dai 3 di Avrîl, zornade des celebracions pe Fieste de Patrie dal Friûl, a podaran vistî di fieste i lôr comuns.

La Agenzie Regjonâl pe Lenghe Furlane, intai mêss passâts, e à cjapât contat cun ducj i comuns furlans, metintsi a lôr disposizion pe distribuzion dal standart – ricognossût in maniere uficiâl cuntune leç regjonâl – che al mostre, suntun fondâl celest, la innomenade acuile eraldiche colôr aur cu lis alis viertis. «La rispueste dai Sindics e je stade une vore positive – al à marcât il president de ARLeF, Eros Cisilino -. La machine organizative e je za in vore di un pôc di timp e in curt o scomençarìn cu la distribuzion, che e finirà in timp par podê celebrâ ducj insiemi il 3 di Avrîl, piturant di celest e zâl i lûcs simbul de Patrie».

La bandiere dal Friûl e je il setim vessil plui antîc in Europe (1334). La origjin de bandiere dal Friûl e rimonte ai tims dal principât dai Patriarcjîs di Aquilee, clamât ancje Patrie dal Friûl o Stât patriarcjâl furlan, un stât sovran che dal 1077 al 1420 al guviernà il Friûl e, in moments alternis, ancje altris teritoris. L'esemplâr plui innomenât e antîc de bandiere patriarcjâl al è esponût intal Museu dal Domo di Udin.

La iniziative de ARLeF e rive un an dopo de fieste “virtuâl” dal 2020: «Chê passade e je stade une fieste diverse dal solit – al à sclarît Cisilino -, ma che nus à fat viodi dute la passion straordenarie, il sintiment di union e di identitât dai furlans». Ancje se tal rispiet de campagne di distanziament sociâl #joorestiacjase, necessarie par vie dal moment che si sin cjatâts a vivi, pardabon in tancj a àn rispuindût ae iniziative de ARLeF. Cussì, a son stadis passe 500 lis fotografiis di bandieris rivadis ae Agenzie di ogni cjanton dal Friûl, ma ancje di bande di furlans fûr de regjon o dal forest.

Udin, ai 24 di Fevrâr dal 2021

### INFORMAZIONS PE STAMPE - INFORMAZIONI PER LA STAMPA

**Ufficio Stampa ARLeF** CALT relazioni pubbliche / e-mail: [arlef@caltpr.it](mailto:arlef@caltpr.it)

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<<<